



Pou Piblikasyon Imedya: 18/10/2022

GOUVÈNÈ KATHY HOCHUL

**GOUVÈNÈ HOCHUL SIYEN PAKE LEJISLASYON POU RANFÒSE PWOTEKSYON
AK SIPÒ POU SIVIVAN VYOLANS DOMESTIK YO NAN KAD MWA
SANSIBILIZASYON SOU VYOLANS DOMESTIK LA**

Lejislasyon (S.6363-A/A.8102-A) asire sezi zam moun ki gen yon manda pwoteksyon si jij la detèmine ke posesyon an rete yon danje

Lejislasyon (S.6443-B/A.8105-B) egzije Jij Triminal Kriminèl oswa Familyal yo enfòme sou posesyon yon zam akize a lè yo soti manda pwoteksyon yo

Lejislasyon (A.7748-A/S.3855-A) Pèmèt sivivan agresyon seksyèl yo aplike pou Eleksyon Konsèy Eta a pou sele enfòmasyon enskripsyon elektè yo de piblik yo

Lejislasyon (S.7157-A/A.6207-B) egzije sèvis piblik yo pèmèt sivivan vyolans domestik yo dezabone nan kontra pataje yo san penalite

Lejislasyon (S.7263-A/A.2519-A) egzije Konpayi Asirans Sante yo bay sivivan vyolans domestik yo opsyon pou bay lòt chwa enfòmasyon pou kontakte yo pou gen aksè nan enfòmasyon pou reklamasyon ak benefis

Jodi a Gouvènè Kathy Hochul te siyen yon pake lejislasyon k ap ranfòse pwoteksyon pou sivivan vyolans domestik ak vyolans ki baze sou sèks yo lè li asire ke yo sezi zam nan men patnè ki agresif yo epi pwoteje konfidansyalite sivivan yo. Gouvènè Hochul te ratifye senk pwojè lwa an lwa ansanm ak sivivan, defansè, ak chanpyon lejislatif yo nan Union Settlement, yon òganizasyon san bi likratif ki bay resous pou sivivan yo nan East Harlem.

"Administrasyon mwen an angaje pou eradike vyolans domestik epi sipòte sivivan yo - yon misyon ki te yon pakou pandan tout yon vi pou jenerasyon fanm nan fanmi mwen," **Gouvènè Hochul te deklare.** "Mwen fyè pou ratifye nouvo lwa sa yo k ap amelyore konfidansyalite, kenbe Nouyòkè yo lwen danje, epi ba yo fleksibilité yo bezwen pou pran pi bon desizyon pou tèt yo ak fanmi yo."

Lwa yo ki te siyen pandan [Mwa Sansibilizasyon sou Vyolans Domestik](#) la, ke yo obsève nan oktòb chak ane, reyafime angajman fèm Gouvènè Hochul pou pwoteje dwa sivivan

yo epi diminye aksè abizif patnè ki gen zam yo, ki itilize yo nan apeprè yon tyè nan krim vyolans domestik ki rapòtè nan Eta New York.

Direktè Egzekitif Biwo pou Prevansyon Vyolans Domestik lan Kelli Owens te deklare, "Lejislasyon jodi a ap ranfòse sekirite pou tout sivivan, paske nan sitiyasyon vyolans domestik ak seksyèl, sekirite konte anvan tout lòt bagay. Ke n ap pale de sekirite zam, dwa konfidansyalite, oswa abi finansye, nou vle Nouyòkè yo konnen ke yo gen opsyon, resous ak pwoteksyon. Mwen onore pou sèvi Gouvènè Hochul, ki te toujou yon vrè defansè pou sivivan yo."

Direktris Biwo Sèvis pou Víktim yo (Office of Victim Services, OVS), Elizabeth Cronin, te deklare, "Pifò travay pwofesyonèl asistans víktim yo fè se bay sèvis ak sipò pou víktim ak sivivan yo apre krim lan. Pake lejislasyon konplè sa konsantre sou prevansyon lè li ranfòse kapasite tribinal la pou limite aksè yon agresè nan zam epi bay moun yo kapasite pou fè chwa ki nan pi bon enterè yo. Mwen bat bravo pou Gouvènè Hochul pou efò pou diminye epi anpeche vyolans domestik ak seksyèl yo ak angajman fèm li pou amelyore lavi víktim ak sivivan krim yo."

Lejislasyon S.6363-A/A.8102 egzije tribinal yo pou òdone sezi zam, fizi, ak fizi chas yo lè yon konjwen agresif refize remèt yo volontèman ki meprize yon manda tribinal ki soti ki gen rapò ak yon manda pwoteksyon. Lwa a ap asire ke yo sezi zam moun ki gen yon manda pwoteksyon epi ke yo deja jije ki poze yon danje si yo pa obeyi volontèman a yon manda anvan pou remèt yo.

Lejislasyon S.6443-B/A.8105-B egzije jij tribinal kriminèl ak familyal yo enfòme pou konnen si yon moun ke y ap bay yon manda pwoteksyon posede yon zam. Byenke gen lwa ki egziste ki egzije pou yo anile oswa sispann lisans zam moun sa yo, yo pa egzije jij yo pou poze kesyon sa.

Senatè Eta a Shelley Mayer, te deklare, "Nou pa ka kontinye otorize pou zam rete nan men agresè yo akoz eka ki egziste nan sistèm jidisyè nou an. Pwojè lwa ke mwen entwodui ak Manm Asanble Clark, S.6363A/A.8102 ak S.6443B/A.A8015B, se mezi ki sanse k ap bay plis pwoteksyon pou sila yo ki fè fas ak vyolans ak zam, espesyalman nan sitiyasyon vyolans domestik. Mèsi Gouvènè Kathy Hochul dèské ou ratifye pwojè lwa sa yo an lwa."

Manm Asanble Sarah Clark te deklare, "Pandan n ap kontinye mete aksan sou Mwa Sansibilizasyon Vyolans Domestik la, de pwojè lwa enpòtan ki ratifye an lwa jodi a ap ranfòse aksyon tribinal la pa rapò ak aksè nan zam epi egzije pou pran lòt mezi lè y ap bay yon manda pwoteksyon. Édtan ki vini touswit apre enplikasyon fòs lòd oswa tribinal yo se lè ki pi danjere pou víktim vyolans domestik yo epi prezans zam yo ogmante chans pou danje. Nou dwe fè tout sa nou kapab pou diminye risk pou reprezay oswa plis vyolans. Nou konnen tou pandemi an te abouti sou yon ogmantasyon nan vyolans domestik ak abi nan tout nivo, ki rann li klè ke gen anpil travay ki pou fèt pou ogmante resous ak pwoteksyon pou sivivan yo. Sekirite ak kapasite sivivan yo pou pwospere pa ka tann, epi mwen rekonesan pou angajman Gouvènè Hochul pou lespwa ak pou defans li pou fanmi ki pi vilnerab nou yo."

Lejislasyon S.3855/A.7748-A otorize sivivan vyolans seksyèl yo aplike pou Konsèy Eleksyon eta a pou enfòmasyon enskripsyon elektè yo sele pou publik la pa wè, kidonk pou ogmante pwoteksyon konfidansyalite ki enpòtan k ap evite pou dosye yo pa devwale sou demann lwa libète enfòmasyon an. Dapre lwa ki egziste a, sèl sivivan krim vyolans domestik yo ki ka kenbe enfòmasyon sa konfidansyèl.

Senatè Eta Tim Kennedy te deklare, "Li enpòtan pou nou fè tout sa nou kapab pou pwoteje sivivan vyolans seksyèl yo kont agresyon ak reprezay. Lè nou elaji kad sivivan ki kalifye pou yo sele dosye elektè yo, n ap asire ke nou senpleman fè devwa nou antanke yon sitwayen pou vote pa egzije yon sivivan mete sante ak sekirite li an danje. Mèsi Gouvènè Hochul dèské ou ratifice pati lejislasyon enpòtan sa an lwa".

Manm Asanble Fred Thiele te deklare, "Plizyè ane de sa Eta New York te adopte lejislasyon pou pwoteje konfidansyalite ak sekirite viktim vyolans domestik yo lè li te otorize pou yo kenbe dosye elektè yo konfidansyèl sou demann. Lejislasyon mwen an elaji pwoteksyon sa pou antre viktim agresyon seksyèl yo. Twòp Nouyòkè ap viv nan laperèz akoz vyolans seksyèl. Pandan n ap kontinye konba nou kont krim lahèn sa yo, li enpòtan pou bay konfidansyalite ak sekirite pou viktim yo lè nou otorize pou kenbe enfòmasyon jeografik ki lye ak dosye elektè yo konfidansyèl. Viktim yo ta dwe santi yo an sekirite pou egzèse dwa konstitisyonèl yo pou vote. Mwen remèsyé Gouvènè Hochul dèské li apwouve lejislasyon sa."

Lejislasyon S.7157-A/A.6207-B elaji egzijans ki egziste pou sèvis publik, konpayi san fil, kab, satelit, ak telekomunikasyon yo pèmèt moun ki sou kontra pataje ak sivivan vyolans domestik yo dezabone kontra sa san frè, penalite, oswa chaj. Lejislasyon an elaji lwa ki egziste yo lè li entèdi aksyon konpayi yo ki limite kapasite oswa volonté sivivan yo pou kite kontra pataje sa yo.

Senatè Eta a Kevin Parker te deklare, "Se pa tout domaj la ki soti nan Vyolans Domestik ki fizik, anpil se ekonomik. Lejislasyon mwen an fèt pou soulaje domaj ekonomik sa lè li soulaje sivivan yo de fakti sèvis publik yo ki agresè yo souvan itilize kòm zam. Gen anpil ki bezwen fèt pou abòde kontrent ekonomik ke sivivan yo fè fas, sa se yon ti etap, men yon etap enpòtan. Mèsi, Gouvènè Hochul, paske w te siyen lejislasyon ki nesesè sa an lwa."

Manm Asanble Linda B. Rosenthal te deklare, "Pandan pandemi COVID la, ka vyolans domestik (VD) yo te ogmante nan fason eksponansyèl, ki ajoute nan kantite moun ki te deja afekte pa flewo VD la. Toutotan tan ap pase, taktik moun ki komèt vyolans domestik yo te evolye, epi yo te kreye nouvo mwayen pou egzèse kontwòl sou viktim yo, ki enkli nan kontra kab pataje, telefòn ak sèvis publik. Kite yon sitiayson vyolans domestik pa janm fasil, epi sivivan yo pa ta dwe gen fado ak lòt enkyetid pou retire tèt yo nan yon kontra pataje ak agresè yo. Mwen kontan pou wè Gouvènè Hochul siyen lejislasyon mwen an, pandan Mwa Sansibilizasyon Vyolans Domestik la, pou bay sivivan yo ti soulajman lè li pèmèt yo libere pi fasilman nan kontra pataje yo."

Lejislasyon S.7263-A/A.2519-A egzije konpayi asirans sante ak òganizasyon sèvis sante yo bay sivivan vyolans domestik yo opsyon pou bay lòt chwa enfòmasyon pou kontakte yo pou yo ka gen aksè nan enfòmasyon pou reklamasyon ak benefis nan yon fason ki kouvri epi pwoteje yo kont agresè yo. Chanjman an ap pèmèt sivivan yo chèche sèvis medikal ak mantal epi itilize asirans sante yo pou peye san yo pa pè pou yo voye korespondans pou reklamasyon, fòm, oswa fakti asirans nan adrès moun ki asire a.

Senatè Eta John Liu te deklare, "Sivivan vyolans domestik yo souvan bezwen diskresyon lè y ap chèche asistans nan men founisè sèvis yo pou pwoteje konfidansyalite ak sekirite yo. Pwojè Iwa sanse sa bay plis sekirite a sivivan vyolans domestik yo lè li egzije konpayi asirans sante yo bay èd ke yo bezwen pandan I ap pwoteje konfidansyalite ak sekirite yo kont agresè yo. Anpil remèsiman pou Gouvènè Hochul ak kòlèg mwen yo nan lejislati a paske yo ajoute yon nouvo kouch pwoteksyon pou viktim vyolans domestik yo."

Manm Asanble Steven Cymbrowitz te deklare, "Lejislasyon ke mwen entwodui a (A.2519) ap ede pwoteje konfidansyalite ak sekirite viktim agresyon domestik yo, k ap pèmèt yo gen aksè nan sèvis medikal oswa sante mantal ki enpòtan san yo pa pè pou reklamasyon oswa korespondans pou fakti yo pa revele kote yo ye oswa enfòmasyon ki sansib bay agresè yo. Menm jan, moun ki toujou ap viv nan sitiyasyon abizif yo ap gen plis chans pou chèche tretman ki nesesè si konfidansyyalite yo ka asire — epi tretman sa ka ede yo konekte ak resous nan kominate yo ki ede viktim vyolans domestik yo."

Pake lejislasyon sa apiye efò solid Gouvènè Hochul pou abòde vyolans ki baze sou sèks ak vyolans domestik nan tout Eta New York. Gouvènè a te ratifye lejislasyon otòn sa an Iwa ki ogmante kouvèti Lwa sou Dwa Zimen pou sivivan vyolans domestik yo, k ap amelyore aksè yo nan pwosesis pou pote plent lè li entèdi diskriminasyon kont yo nan domèn tankou lojman ak akomodasyon piblik. Anvan, yo te kouvri sèlman antanke yon klas pwoteje dapre previzyon pou travay Lwa sou Dwa Zimen an.

Nan mwa avril, Gouvènè Hochul te soti yon dekrè egzekitif ki mande Biwo Prevansyon Vyolans Domestik (Office for the Prevention of Domestic Violence, OPDV) pou kreye yon politik ki ranfòse pwosedi Eta New York yo pou abòde vyolans domestik ak vyolans ki baze sou sèks nan espas travay la. Nan kòmansman mwa sa, OPDV te soti yon politik modèl, ke ajans eta yo ka itilize pou asire pwosedi ki apwopriye yo anplas pou oryante repons yo lè pwoblèm vyolans domestik ak vyolans patnè entim enpakte espas travay la.

Plizyè santèn Nouyòkè fè fas ak vyolans domestik - prensipalman fanm. An 2021, yo te pibliye plis pase 195,000 òdonans pwoteksyon kont vyolans domestik nan Eta New York, yon ogmantasyon 18 pouzan pa rapò ak 2020. Pandemi COVID-19 la agrave pwoblèm vyolans domestik yo, avèk apèl nan liy telefonik ijans Eta New York yo ki te ogmante a 34 pouzan apeprè depi kòmansman kriz sanitè a.

Pou konprann pi byen pèsepsyon publik la sou vyolans domestik, OPDV te mennen yon sondaj publik sou 5,000 Nouyòkè sezon ete sa. Rezulta yo te sijere ke byenke pifò Nouyòkè konfyan nan konpreyansyon yo sou vyolans domestik ak vyolans ki baze sou sèks epi anpil konnen yon moun yo te abize, twòp nan yo kwè ke pwoblèm sa yo depann de faktè ekstèn — konsomasyon dwòg oswa alkòl, move kontwòl enpilzyon, oswa pwoblèm kolè — olye desizyon yon patnè ki agresif.

Pandan 30 ane ki sot pase yo, OPDV te rete sèl ajans nan nivo kabinè nan peyi a ki devwe a pwoblèm vyolans ki baze sou sèks la. Misyon ajans lan se amelyore repons Eta New York ak prevansyon vyolans domestik ak seksyèl ak objektif pou amelyore sekirite tout Nouyòkè nan relasyon entim yo atravè règleman, pwogram, ak sansibilizasyon publik. OPDV travay tou ak founisè lokal yo pou asire ke sèvis yo santre sou sivivan yo, enfòme sou twomatis yo, epi reponn sou plan kiltirèl nan tout eta a.

Liy Asistans sou Vyolans Domestik ak Vyolans Seksyèl (Domestic and Sexual Violence Hotline) Eta New York la, bay sipò konfidansyèl gratis, 24/24 epi li disponib nan pifò lang: 800-942-6906 (apèl), 844-997-2121 (mesaj tèks) oswa @opdv.ny.gov (chat). Moun ka ale tou sou www.ovs.ny.gov/connect pou jwenn yon pwogram asistans pou viktim nan kominate yo a. Biwo Sèvis pou Viktim yo finanse epi sipòte plis pase 200 pwogram ki bay sèvis dirèk pou viktim ak sivivan krim yo ak fanmi yo, ki enkli terapi, gwooup sipò, jesyon ka, asistans legal sivil, akonpayman nan tribunal, ak transpò, pam iòt asistans.

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418